

МИХО

ПАЙҒАМБАРНИНГ КИТОБИ

Кириш

Михо пайғамбар Яхудо юртидаги кичкина бир қишлоқда туғилган. У Ишаё пайғамбарнинг замондоши бўлиб, милоддан олдинги 722 йилда Исроил* халқи Оссурияга сургун қилинишидан олдин фаолият кўрсатган.

Михо пайғамбар Исроилнинг пойтахти Самария ҳақида ва Яхудонинг пойтахти Куддус ҳақида башорат қиласди. Иккала пойтахтнинг амалдорлари ва бойлари бутун халқни йўлдан оздириб, бутларга сажда қилишни ўргатишади. Бундан ташқари, фирибгарлик қилиб, камбағалларни талон–тарож қилишади. Шу сабабларга кўра, Исроил ва Яхудо халқларини Худо жазоламоқчи бўлади. Михо пайғамбар Исроил ва Яхудо халқларининг бошига тушадиган мусибатлар ва тутқунлик азоблари ҳақида башорат қиласди.

Аммо келажакда Исроил ва Яхудо халқлари яна ҳақ Худога сажда қилишади. Шунда Худо уларни ўз юртига қайтариб олиб келади, ғалабалар сари етаклайдиган ҳақиқий ҳукмдорни уларга тақдим қиласди. Ўша вақт келганда, ҳамма жойда осойишталик қарор топади. Худо Ўзи танлаган ҳукмдор билан биргалиқда халққа чўпонлик қиласди. Исроилни бошқарадиган бу зот Байтлаҳм шаҳрида таваллуд топиши ҳақидаги башоратлар ҳам мазкур китобдан ўрин олган.

1-БОБ

¹ Яхудо* шоҳлари Йўтом, Охоз ва Ҳизқиё ҳукмронлик қилган даврларда* Эгамиз Мўрашатлик* Михо пайғамбарга Ўз сўзини аён қилиб турди. Самария ва Куддус* ҳақида Эгамиз айтган бу сўзлар Михо пайғамбарга ваҳий орқали аён бўларди.

Самария ва Куддус ҳукм қилинади

² Қулоқ туting, эй халқлар!

Қулоқ солинг, ер юзида яшовчилар!

Эгамиз Раббий сизларга қарши гувоҳлик беради.

Муқаддас Маъбадидан Раббий гапиради.

³ Ана, Эгамиз Ўз масканидан чиқяпти,

Тоғ чўққиларини босиб келяпти.

⁴ Унинг оёғи остида эрийди тоғлар,

Ёрилиб кетади даралар.

Тоғлар оловда эриган мум каби бўлади,

Тепалиқдан оқиб тушган сувдай тўкилади.

⁵ Ёқуб насли* итоатсизлик қилгани учун,

Исройл гуноҳга ботиб кетгани учун

Бу воқеалар содир бўлади.

Ёқуб насли орасида итоатсизлик қилган ким?

Пойтахт шаҳар Самария эмасми?!

Бутпарастлар уяси* Яхудонинг қаерида жойлашган?

Куддуснинг нақ ўзида эмасми?!

⁶ Эгамиз шундай дейди:
 “Мен Самарияни вайрон қиласман.
 Уни ток экиладиган жойга айлантираман.
 Шаҳар деворларини ийқитаман,
 Девор тошларини водийга юмалатаман.
 Унинг пойдеворларини очиб ташлайман.
⁷ Самариянинг бутлари парча-парча бўлади,
 Барча санамлари синдириб, ёндирилади.
 Фаҳш йўли билан келган бутларнинг қимматбаҳо безаклари
 Ўзга юрт фоҳишаларига* тўлов қилиб берилади.”

Михо пайғамбарнинг марсияси

⁸ Бундай мусибат дастидан йиғлаб, фарёд қиласман,
 Яланғоч, оёқ яланг юраман,
 Чиябўридай увиллаб, фифон чекаман,
 Бўта* каби бўзлаб йиғлайман.
⁹ Ахир, даво йўқ Самариянинг ярасига,
 Ёпишди Яхудога ҳам у яра,
 Халқим дарвозаси — Куддусга юқди.

¹⁰ Гат аҳолиси билан бу ҳақда ҳасратлашманг*,
 Улар олдида кўз ёшингизни тўкманг!
 Байт-Лафрода бориб,
 У ерда қайғудан тупроққа юмаланг!*

¹¹ Эй Шофир* аҳли,
 Сиз асирикка кетасиз,
 Яланғоч, шарманда бўлиб борасиз.
 Занон* халқи ташқарига чиқишига журъат этмайди.

Байт-Эзел* аҳли мотам тутади,
 Энди улар сизга паноҳ бўлмайди.
¹² Морӯт* аҳолиси мадад кутган эди,
 Аммо Эгамиз фалокат юборди.

Бу фалокат ҳатто Куддус дарвозаларига етди.

¹³ Эй Лахиш* аҳли,
 Отларингизни жанг араваларига қўшинг!
 Сиз итоатсиз Истроил халқига тақлид қилдингиз,
 Куддус аҳлини* илк бор гуноҳга бошладингиз!*

¹⁴ Шундай экан, эй Яхудо халқи,
 Энди Мўрашат* билан хайрлашаверинг,
 Эсадалик совғаларингизни уларга тақдим қилинг*.
 Аттанг, Ахсиб* аҳли Истроил шоҳларига панд берди,
 Бера олмайдиган ёрдамни уларга ваъда қилди.

¹⁵ Эй Моришо* аҳли,
 Эгамиз устингизга бир босқинчини юборади.
 Истроил йўлбошчилари Адуллам горига қочиб боришади.

¹⁶ Суюкли фарзандларингиз учун нола қилинг,
 Сочингизни қирдиринг*.
 Калхатлар каби сийқа бош бўлинг,
 Ахир, болаларингиз* сургун қилинади.

2-БОБ

Бечораҳолни эзган золимларнинг қисмати

¹ Эй тўшагида ётиб, ёвузликни режалаштирганлар!*

Сизнинг ҳолингизгавой!

Тонг отганда сиз

Режаларингизни амалга оширасиз.

Ҳа, бу сизнинг қўлингиздан келади.

² Сизлар бирорвнинг экинзорига кўз олайтириб,

Уни тортиб оласиз.

Бирорвнинг уйини ёқтириб қолиб,

Уни ўзингизники қилиб оласиз.

Бирини ўз уйидан,

Бошқасини мерос қилиб олган еридан маҳрум этасиз.

³ Шу сабабдан Эгамиз демоқда:

“Мен сизларга қарши фалокатни режа қиляпман.

Сизлар бўйинтуруқдан қочиб қутуломайсиз,

Бурнингизни осмонга кўтариб юрмайсиз.

Бу оғир дамлар бўлади.”

⁴ Ўша вақт келганда, сизларни масхара қилиб,

Одамлар шундай аччиқ марсия куйлашади:

“Биз меросимиздан маҳрум бўлдик!

Далаларимиз душманларга* бўлиб берилиди.

Энди биз бутунлай хароб бўлдик!”

⁵ Шундай экан,

Эгамизнинг халқи қайтадан бўлганда юртни,

Улуш қилиб олмайсиз сиз бир парча ерни.

⁶ Сизлар менга ақл ўргатиб деяпсиз:

“Бизга ақл ўргатма!

Нафасингни иссиқ қил,

Биз шарманда бўлмаймиз.”

⁷ Эй Ёқуб насли*, сизлар айтасиз:

“Наҳотки Эгамизнинг сабри тугаган бўлса?!

Наҳотки Худо шундай ишларни қилса?!”

Бу сўзларни айтишингиз жоизми?!

Ахир, Худонинг сўзлари тўғри одамга яхшилик келтиради-ку!

⁸ Эгамиз демоқда:

“Сизлар ўз халқингизга зулм қилдингиз!

Хотиржам юрган одамнинг қадамини пойладингиз.

Жангда талафот кўрган одамга ўхшатиб,

Унинг эгнидаги тўнини ечиб олдингиз.

⁹ Халқимнинг аёлларини шинам уйларидан чиқариб юбордингиз,

Фарзандларининг насибасини Менинг юртимдан уздингиз*.

¹⁰ Қани, туриңлар, кетиңлар бу ердан!

Ором топа олмайсиз энди бу юртда!

Ахир, қилган гуноҳларингиз юртимни ҳаром қилди,

Юртимнинг хароб бўлишига сабаб бўлди.

¹¹ Борди-ю, олдингизга ёлғончи одам келса,
— Шароб, бўзадан ваъз айтаман, — деб айтса,
Сизлар уни пайғамбар дея қабул қиласиз!

Умидбахш ваъда

¹² Эй Ёқуб насли*,
Мен сизларни албатта йиғаман,
Эй Истроилнинг омон қолганлари,
Мен сизларни тўплаб оламан.
Кўрадаги кўйлардай, яйловдаги сурувдай,
Сизларни Мен бир жойга йиғаман.

Ўшанда юртингиз одамларга тўлиб-тошади.

¹³ Мен Йўлбошчингиз бўлиб, сизларга йўл очаман,
Сизларни сургундан олиб чиқаман.
Сизлар шаҳар дарвозасидан чиқиб кетасиз.
Мен, Шоҳингиз сизларни бошлаб бораман.
Мен, Эгангиз, олдинда юраман.”

3-БОБ

Михо Истроил йўлбошчиларига танбеҳ беради

¹ Мен шундай дедим:

“Эй Ёқуб наслининг йўлбошчилари, эшитинг!
Эй Истроил* ҳукмдорлари, қулоқ солинг!
Адолат ўрнатиш сизнинг вазифангиз-ку!
² Сизлар эса яхшилиқдан нафратланасиз,
Қабиҳликка меҳр қўясиз,
Сиз халқимнинг терисини шилиб,
Этини суягидан ажратиб оласиз.
³ Сиз халқимнинг этини ейсиз,
Терисини шилиб, суякларини майдалайсиз,
Қозонга солинадиган гўштдай уларни нимталайсиз.
⁴ Вақти келиб, Эгамизга илтижо қиласиз,
Ўшанда Худодан жавоб олмайсиз.
Сизлар қабиҳларча иш тутдингиз,
Шу боис У сизлардан юз ўгиради.”

⁵ Эгамиз шундай демоқда:

“Эй халқимни йўлдан оздирган пайғамбарлар!
Сизлар қорнингизни тўйғизганларга тинчликни башорат қиласиз,
Оғзингизни мойламаганларга эса урушни эълон қиласиз.

⁶ Энди устингизга тун бостириб келади,
Сизлар ваҳийларни кўрмайсиз.
Қаро зулмат сизни ўраб олади,
Башорат қилишингизга имкон бўлмайди.
Сизлар учун қуёш ботади,
Кундуз ҳам зулмат бўлади.
⁷ Шарманда бўласиз, эй валийлар,
Уятга қоласиз, эй фолчилар.

Мендан сўз олмаганингиз учун
Оғзингизни очолмай қоласиз.”

⁸ Аммо менинг вужудим кучга тўлган,
Эгамизнинг Руҳи мени тўлдирган.
Қудрат ва адолатга тўлганман.
Энди мен Ёқуб наслининг итоатсизлигини фош қиласман,
Исройл^{*} халқининг гуноҳини юзига соламан.
⁹ Эй Ёқуб наслининг йўлбошчилари, эшигинг!
Эй Исройл ҳукмдорлари, қулоқ солинг!
Сизлар адолатдан ҳазар қиласиз,
Ҳақиқатни бузиб қўрсатасиз.
¹⁰ Конлар эвазига барпо қилдингиз Қуддусни,
Зулм эвазига бунёд этдингиз Сионни!*

¹¹ Эй Қуддус ҳокимлари, сизлар пора олиб ҳукм қиласиз,
Эй Қуддус руҳонийлари, сизлар тама қилиб таълим берасиз,
Эй Қуддус пайғамбарлари, сизлар пул учун башорат қиласиз.
Тагин Эгамизнинг номини рўкач қилиб, айтасиз:
“Эгамиз биз билан, бунга шубҳа йўқ!
Бошимизга бирор кўргилик тушмас.”

¹² Сизлар сабабли
Қуддус даладай шудгор қилинади,
Сион харобазор бўлади,
Эгамизнинг уйи турган тоғни^{*}
Қалин чакалакзор қоплайди.

4-БОБ

Эгамиз бутун дунёда тинчлик ўрнатади

¹ Шундай кунлар келадики,
Эгамизнинг уйи турган тоғ^{*}
Тоғларнинг энг юксаги бўлиб қарор топади.
Бу тоғ ҳаммасидан ҳам баланд бўлади,
Халқлар у ерга дарёдай оқиб келади.
² Кўплаб эллар келади,
Улар шундай деб айтади:
“Қани, юринглар!
Чиқайлик Эгамизнинг тоғига!
Қани, юринглар!
Борайлик Ёқубнинг Худоси уйига!
Токи У бизга ўргатсин Ўзининг йўлларини,
Токи юрайлик бизлар Унинг сўқмоқларидан.”
Ахир, Эгамизнинг каломи келиб чиқар Қуддусдан,
Ҳа, Худонинг таълимоти келиб чиқар Сиондан.
³ Эгамиз ҳукм қиласди кўп халқларнинг орасида,
Ажрим қиласди олисдаги кучли миллатлар орасида.
Қиличларини айлантиришади омочга,
Найзаларини эса ток қайчиларига.
Қилич кўтармайди бир-бирига халқлар,

Ҳеч қачон жанг қилмайди улар.
⁴ Ором олар ҳар ким ўз узумзорида,
 Ўтирас ҳар ким ўз анжирзорида,
 Бирор кимса уларга таҳдид солмайди.
 Буни Сарвари Оламнинг Ўзи айтди!

⁵ Ҳамма халқлар ўз худоларига эргашаверсин,
 Биз эса абадулабад Эгамиз Худонинг йўлидан юрамиз.

Исройл халқи сургундан қайтиб келади

⁶ Эгамизниң каломи шудир:
 “Шундай вақт келадики, Мен чўлоқларни йиғиб оламан.
 Ҳайдаб юборилганларни тўплайман,
 Ўзим азобга гирифтор қилганларимни йиғаман.
⁷ Чўлоқларни омон сақлайман,
 Ҳайдаб юборилганлардан кучли бир халқ бунёд этаман,
 Ўша кундан бошлаб, то абад Мен, Эгангиз,
 Сион тоғида уларга хукмронлик қиласман.”

⁸ Эй Куддусдаги шоҳ қалъаси,
 Худо халқининг кузатув минораси,
 Собиқ ҳокимииятинг ўзингга қайтади.
 Эй Куддус шаҳри*,
 Сенинг салтанатинг қайта тикланади.

⁹ Энди эса нечун фарёд қиляпсан?
 Нима бўлди, хукмдоринг йўқмиди?!
 Нечун тўлғоқ тутган аёл каби азобланяпсан?
 Маслаҳатчинг нобуд бўлдими?!

¹⁰ Эй қиз Куддус*,
 Туғаётган хотин каби оҳ–воҳ қилмайсанми?!
 Ўзингни ҳар томонга ташламайсанми?!
 Ахир, ҳозир шаҳардан чиқиб кетасан!
 Яланг қирларга бориб маскан қиласан!
 Ҳа, Бобилга сен сургун бўласан*.
 Бироқ у ерда сен нажот топасан,
 Душман қўлидан халос қиласан Эгамиз сени.

¹¹ Сенга қарши бирлашди талай халқлар,
 Сен ҳақингда шундай деб айтади улар:
 “Қани, келинглар, Куддусни хўрлаймиз,
 Шаҳват билан уни томоша қиласиз.”

¹² Аммо билмас улар Эгамизниң ниятини,
 Асло тушунмаслар Унинг режаларини,
 Эгамиз уларни не сабабдан йиққанини улар билмаслар,
 Буғдой бошоқларини хирмонда янчгандай,
 Эгамиз уларни янчмоқчи эканини англамаслар.

¹³ Эгамиз демоқда:
 “Туринг, эй Куддус аҳолиси!
 Янчиб ташланг уларни!*

Темирдан қиласман шохларингизни,

Бронзадан ясайман туёқларингизни,
Эзиб мажақлайсиз кўплаб халқларни.”
Олган ўлжангизни Эгамизга бағишилайсиз,
Бутун олам Раббийсига ёв бойлигини назр қиласиз.

5-БОБ

Худо Байтлаҳмлик Ҳукмдорни ваъда қиласиди

¹ Эй Куддус, йиққин лашкарингни!
Ғанимлар бизни қуршовга олди!*

Улар Исройл ҳукмдорининг бетига таёқ билан уради*.
² Аммо Эгамиз демоқда:
“Эй Эфратдаги Байтлаҳм,
Сен Яхудонинг митти шаҳри бўлсанг ҳам,
Исройлни Мен учун бошқарадиган зот сендан чиқади*.
Унинг насаби қадимларга бориб тақалади.”

³ Ҳа, Эгамиз Исройл халқини бир муддатга душманларга таслим қиласиди,
Аммо бу ҳол узоқ давом этмайди.
Ҳомиладор аёлнинг кўзи ёриганда,
Бўлғуси ҳукмдорнинг биродарлари сургундан қайтади.
Улар Исройл халқи билан бирлашади.

⁴ Эгамизниң қудрати ила ўша ҳукмдор сурувини боқади,
Ўз Эгаси Худонинг улуғворлиги ила уларни бошқаради.
Исройл халқи хатарсиз яшайди,
Ахир, ҳукмдорининг довруғи бутун дунёга ёйилади.
⁵⁻⁶ Ўша зот тинчлик ўрнатувчи бўлади.

Мабодо Оссурияликлар*
Юртимизга бостириб келса,
Чегарамизга қадам босса,
Ҳукмдоримиз бизни ҳимоя қиласиди.
Ҳа, Оссурияликлар
Юртимизга бостириб келса,
Қалъаларни улар ёриб ўтса,
Биз уларга қарши етти йўлбошчини танлаймиз,
Ҳатто саккиз раҳнамони тайинлаймиз.
Улар қилич кўтариб, Оссурия устидан ҳукмронлик қилишади,
Нимрўднинг ерида ўз ҳукмини ўтказишади.

⁷ Кўп халқлар орасида
Ёқуб наслининг* омон қолганлари
Эгамиз осмондан туширадиган
Шудрингдай бўлишади,
Майсаларни суғорадиган
Ёмғирга ўхшаган бўлишади.
Уларни ҳеч ким тўхтата олмайди,
Улар душманлари устига бостириб боришади.
⁸ Ҳа, кўп халқлар орасида
Ёқуб наслининг омон қолганлари
Ўрмон ҳайвонлари орасидаги

Арслондай бўлишади,
 Қўй суруви орасига кириб қолган
 Шер боласига ўхшаган бўлишади.
 Юрган йўлларида ҳаммага ташланиб ғажишади,
 Уларга ҳеч ким бас кела олмайди.
⁹ Эй Истроил, сенинг қўлинг ёвлардан баланд келади,
 Барча душманларинг қирилиб кетади.

Эгамиз Ўз халқини поклади

¹⁰ Эгамизнинг каломи шудир:
 “Ўша куни отларингизни Мен йўқ қиласман,
 Жанг араваларингизни парча–парча этаман.
¹¹ Вайрон қиласман юртингиз шаҳарларини,
 Яксон этаман жамики қальяларингизни.
¹² Юртингизда сеҳр–жодуга барҳам бераман,
 Орангизда биронта фолбинни қолдирмайман.
¹³ Тасвиру бутсимон тошларингизни йўқ қиласман,
 Бошқа сажда қилмайсиз қўлингиз ижодига.
¹⁴ Ашерага* аталган устунларни қўпориб ташлайман,
 Шаҳарларингиз кулини кўкка совураман.
¹⁵ Менга итоат қиласман халқлар устига
 Қаҳру ғазабимни ёғдириб, қасос оламан.”

6-БОБ

Эгамиз Истроил халқи билан даъволашади

¹ Эгамизнинг сўзини эшитинг:
 “Қани, туриң!
 Тоғлар олдида айтинг даъвоингизни,
 Қирлар эшитсин сизнинг овозингизни.”
² Эй тоғлар, Эгамизнинг даъвосига қулоқ тутинг,
 Заминнинг мангу пойдеворлари*, сиз ҳам эшитинг!
 Эгамиз Ўз халқи билан даъволашади,
 Халқи Истроил билан У баҳслашади.

³ Эгамиз демоқда:
 “Эй халқим, сенга Мен нима қилдим?!

Сенга тушдими бирор оғирлигим?!

Қани, жавоб бергин–чи Менга!

⁴ Мен сизларни Миср юртидан олиб чиққан эдим–ку,
 У ердаги қулликдан халос этган эдим–ку.
 Олдингизга юборгандим йўлбошчиларни —
 Мусо, Ҳорун ва Марямни.

⁵ Эй халқим, наҳот эсламасангиз
 Мўаб шоҳи Болоқнинг ёвуз ниятини,
 Бавўр ўғли Баломнинг унга берган жавобини?!

Шитимдан Гилгалга қилган сафарингизда ҳам
 Нималар юз берганини бир эсланг*.

Бу воқеаларни эсга олсангиз,
 Мен, Эгангиз, сизларни қутқармоқчи бўлиб,

Не–не ишлар қилганимни кўрасиз!”

Худонинг талаблари

⁶ Юксалган Худога сажда қилганимда,
Нима олиб борай Эгамизнинг хузурига?!

Унга атаб қурбонликлар куйдирсаммикан?!

Бир ёшли бузоқларни назр қилсаммикан?!

⁷ Унга атаб минглаб қўчқорларни сўйсам,

Зайтун мойин дарё–дарё қилиб оқизсам

Эгамиз мендан мамнун бўлармикан?!

Итоатсизлигим эвазига тўнғич ўғлимни берайми?!

Гуноҳим эвазига ўз фарзандимни қурбон қилайми?!

⁸ Эй инсон, нима яхши эканлигини

Эгамиз сенга аён қилди.

Шудир Унинг сендан қилган талаби:

Адолатли иш тутгин,

Меҳр–шафқат қилишдан завқ олгин,

Камтар бўлиб, Худонинг йўлидан юргин.

⁹ Худодан кўрқиш — донолик, ахир!

Эгамиз Қуддус аҳлига хитоб қилар:

“Яхшилаб қулоқ солинг!

Мен сизларни ҳадемай жазолайман!*

¹⁰ Эй фосиқлар, ҳаром бойлигингизга қандай кўз юмай?!

Тарозидан уриб йиққан давлатингизни қандай унутай?!

Бундай бойлиқдан жирканаман, ахир!

¹¹ Нотўғри тарозини ишлатган одамни қандай оқлайнин?!

Сохта қадоқ тошлардан фойдаланган кишига қандай чидайнин?!

¹² Эй Қуддус бойлари, сизлар зўравонлик қиляпсиз,

Эй шаҳар одамлари, сизлар алдаяпсиз.

Ёлғондан бошқани билмас тилларингиз.

¹³ Шунинг учун Мен сизларга қақшатқич зарба бераман,

Гуноҳларингиз учун сизларни хароб қиласман.

¹⁴ Сизлар ейсиз, лекин тўймайсиз,

Қорнингиз доим оч бўлади.

Нарса йиғасиз–у, сақлай олмайсиз,

Йикқанларингизни урушда нобуд қиласман.

¹⁵ Сиз экасиз, аммо ўриб олмайсиз.

Мой оласиз, аммо ундан фойдаланмайсиз.

Узум эзасиз*, аммо шаробидан ичмайсиз.

¹⁶ Ахир, сизлар шоҳ Омрининг одатларини ташламаяпсиз.

Ахаб* хонадонининг барча қилмишларига тақлид қиляпсиз,

Уларнинг йўлини тутяпсиз.

Шунинг учун Мен сизларни хароб қиласман.

Сизни кўрганлар сизлардан ҳазар қиласди,

Барча халқлар сизларни ҳақорат этади*.”

7-БОБ

Михонинг марсияси

¹ Шўрим қуриди!

Ёзги мевалар йиғиб олингач,
Узумзор ҳосили йиғиштирилгач,
Токлардан бир бош узум ҳам топа олмаган,
Бир дона анжирга зор бўлган одамдайман мен.

² Художўй йўқ бўлди бу юртда,
Тўғри одам қолмади инсонлар орасида.

Қон тўкаман деб, одамлар бир-бирини пойлайди,
Ҳаттоқи қариндош қариндошига тузоқ қўяди.

³ Ёмонлик қилишга устадир улар.
Амалдору қозилари пора олишади,
Бойлари хоҳлаганини қилдиришади,
Биргалиқда улар ҳақиқатни бузиб кўрсатишади.

⁴ Уларнинг ҳимматлиси янтоқقا ўхшайди,
Виждонлиси бир уюм тикандан қолишмайди.

Эй халқим,
Соқчилар^{*} сизларга эълон қилган кун яқинлашди,
Ха, жазо оладиган кунингиз етиб келди.
Ҳаммангиз саросимага тушадиган вақт бўлди.

⁵ Дўстингизга суянманг,
Шеригингизга ишонманг,
Қучоғингизда хотинингиз ётганда,
Кулф солинг оғзингизга.

⁶ Ўғил ўз отасини хўрлайди,
Қиз онасининг юзига сапчийди,
Келин қайнанасига душманлик қилас.

Сизнинг душманларингиз — ўз уйингиздагилар.

⁷ Мен эса Эгамга тикаман кўзларимни,
Умид ила кутаман нажоткорим Худони,
Албатта эшитар Худойим мени.

Халқ Эгамизга юз буради

⁸ Ҳолимни кўриб шод бўлмангиз, эй ғанимлар!

Йиқилганимда ўзим туриб оларман.
Зулматда ўтирганимда,
Менга нур сочар Эгам.

⁹ Гуноҳ қилдим мен Эгамга қарши,
Унинг қаҳрига дош бераман энди.
Бир кун келиб, У менинг тарафимни олади,
Менинг ҳақлигимни исбот этади.

Ёруғликка олиб чиқади У мени,
Мен кўраман Худонинг адолатини.
¹⁰ Эй душманларим, албатта буни кўрасиз.
“Эганг Худо қани?!” деб мени масхара қилдингиз,
Энди сиз шармандаи шармисор бўласиз.
Мен кўзларим билан кўраман сизнинг қулашингизни,

Оёқ ости бўласизлар кўчадаги лой каби.

Исройлнинг қайта тикланиши ҳақида башорат

¹¹ Эй Куддус, келар шундай замонлар:

Сенинг деворларинг қайта қурилар,
Кенгайиб кетади сенинг ҳудудинг.

¹² Ўша куни халқинг қайтиб келади*.

Улар Оссуриядан Мисргача,
Мисрдан Фурот дарёсигача бўлган
Барча ўзга юртлардан,
Узоқ денгиз соҳилларидан,
Олис тоғлар бағридан келишади.

¹³ Бошқа халқларнинг юртлари эса
Ўз қилмишлари дастидан харобазорга айланади.

Михонинг илтижоси ва Эгамизнинг жавоби

¹⁴ Эй Эгам, Ўз халқингнинг чўпони бўлгин,

Ўз сурувингни таёфинг билан бошқаргин,

Уларнинг ён-атрофи кўм-кўк яйловлар,

Улар эса чакалакзорда яшаяптилар*.

Узоқ ўтмишдагидай уларни ўтлатгин,

Башан ва Гилад* яйловларида уларни тўйғазгин.

¹⁵ Эгамиз демоқда:

“Мен сизларни Мисрдан олиб чиққан кунларимдай,
Сизларга Ўз ажойиботларимни яна кўрсатаман.”

¹⁶ Эй Эгам, ажойиботларинг олдида халқлар

Буюқ лашкарларининг ожизлигини кўриб,

Ўзлари шарманда бўладилар.

Қўллари билан юзларини беркитадилар.

Уларнинг қулоқлари гаранг бўлиб қолади.

¹⁷ Илон каби улар тупроқ ялади,

Судралувчи махлуклар каби тупроқ ошайди.

Эй Эгамиз Худо, улар титраб-қақшаб,

Ўз уяларидан Сенинг олдингга чиқадилар.

Сенинг ҳузурингда даҳшатга тушадилар.

¹⁸ Эй Худо, Сенга ўхшали бормикан?!

Халқингдан омон қолганларнинг

Гуноҳларини Сен кечирасан,

Уларнинг итоатсизлигини афв этасан.

То абад ғазабланмассан халқингдан,

Завқ оласан Ўзинг меҳр-шафқат қўрсатишдан.

¹⁹ Сен бизга яна раҳм қиласан.

Айбларимизни ерга кўмиб юборасан,

Гуноҳларимизни денгиз тубига улоқтирасан.

²⁰ Қадимда ота-боболаримизга онт ичганингдай*,

Сен Ёқуб авлодига садоқатли бўласан,

Иброҳим наслига сўнмас севгингни кўрсатасан.

ИЗОХЛАР

...Яхудо...Исроил... — жанубий шоҳлик ва шимолий шоҳлик назарда тутилган. Тўлиқроқ маълумотга эга бўлиш учун луғатдаги ЯҲУДО ва ИСРОИЛ сўзлариға қаранг.

1:1 Яхудо — жанубий шоҳлик назарда тутилган. Тўлиқроқ маълумотга эга бўлиш учун луғатдаги ЯҲУДО сўзига қаранг.

1:1 ...Йўтом, Охоз ва Ҳизқиё ҳукмронлик қилган даврлар... — милоддан олдинги 740-687 йиллар.

1:1 Мўрашат — Яхудонинг жанубидаги қишлоқ, Куддусдан қарийб 40 километр жануби-ғарбда жойлашган.

1:1 Самария ва Қуддус — Самария Исроилнинг, яъни шимолий шоҳликнинг пойтахти, Қуддус эса Яхудонинг, яъни жанубий шоҳликнинг пойтахти эди.

1:5 Ёқуб насли — Худо Ёқубнинг исмини Исроил деб ўзгартирган (Ибтидо 32:27-28 га қаранг), шунинг учун қўпинча Ёқуб насли деганда Исроил, яъни шимолий шоҳлик аҳолиси назарда тутилади. Бироқ бу ўринда мазкур исм ҳам Исроил, ҳам Яхудо халқларига нисбатан ишлатилган. Ёқуб бу иккала халқнинг бобокалони бўлган. Яхудо халқи Михо пайғамбарнинг башоратини фақат Исроил халқига тааллуқли, деб ўйлаган бўлиши мумкин. Бироқ оятнинг охирги икки қаторидан кўриниб турибдики, Михо пайғамбар Яхудо халқини ҳам бутпарастликда айблаб, жамиятни емирган мажусийлик одатларини фош этади.

1:5 Бутпарастлар уяси — ибронийча матнда *Бамахлар*, яъни “Тепаликлар”. Канъон худоларига топинадиган жойлар бамах деб аталарди. Одатда бу саждагоҳлар тепаликларда жойлашган бўлиб, у ерда Канъон худоларининг тасвирлари ва қурбонликлар келтириш учун қурбонгоҳ бўларди. Бу оятда Михо пайғамбар Қуддус шаҳрини ўшандай тепалик сифатида тасвирламоқда.

1:7 Фаҳш йўли...фоҳишалар... — ўша пайтларда Канъондаги бутпараст халқлар ўз саждагоҳларида диний вазифалардан бирини фаҳш орқали бажаардилар. Бутпараст халқларнинг удумларига кўра, одамлар фоҳишалар ва фоҳишлар билан жинсий алоқа қилиш орқали ўз худоларига топинардилар, худоларидан фаровонлик ато қилишни сўрардилар. Лекин Эгамиз Исроил халқига бу йўл билан сажда қилишни қатъян ман этган (Қонунлар 23:17-18 га қаранг). Фаҳш орқали топилган пулга улар бутхоналардаги бутларни олтину кумуш билан безатишарди. Башоратга кўра, келажакда Самарияни забт этадиган душман лашкари бу қимматбаҳо безакларни ўлжак қилиб, бошқа жойдаги фоҳишаларга сарф қилишади.

1:8 Бўта — ибронийча матнда *Туяқуш*. Туяқуш қаттиқ, мунгли товуш чиқаради.

1:10 Гат аҳолиси билан бу ҳақда ҳасратлашманг... — Филистларнинг бу шаҳри Қуддусдан ғарбда жойлашган бўлиб, Яхудо қир этаклари бағридаги Михонинг она қишлоғига яқин эди. Филистлар Исроил халқининг душмани эди. Шоҳ Шоул ва унинг ўғли Йўнатаң Филистлар томонидан ўлдирилгандан сўнг, Довуд улар учун марсия куйлаган эди. Михо пайғамбар ҳам ўз марсиясини Довуднинг сўзлари билан бошламоқда (2 Шоҳлар 1:20 га қаранг). Яхудо халқининг бошига тушадиган кулфатлардан Филистлар хурсанд бўлишини Михо хоҳламайди. Шу бобнинг 10-16-оятларида босқинчилар Яхудо қир этакларига ғарбдан бостириб келиши ва ўша худуддаги баъзи шаҳар ва қишлоқларни забт этиши ҳақида

ёзилган. Шулар қаторида душманлар Михонинг она қишлоғини ҳам босиб олади. Археологик маълумотларга кўра, милоддан олдинги 701 йилда Оссурия шоҳи Санхарив Яхудо шоҳлигига ғарбдан бостириб келиб, 46 та шаҳарни қўлга киритган. У қарийб 20.000 аҳолини сургун қилгандан сўнг, Куддусга ҳам юриш қилган эди (4 Шоҳлар 18:13-16 га қаранг).

1:10 Байт-Лафрога бориб...тупроққа юмаланг — ибронийчада Байт-Лафро номининг маъноси тупроқ хонадони. Тупроққа ёки кулга юмалаш умидсизликни ва қайғули ҳолатни ифодалайди (Еремиё 6:26, Ҳизқиёл 27:30 га қаранг).

1:11 Шофир — ибронийчадаги маъноси ёқимли, бироқ бу шаҳар аҳолисининг қисмати асло ёқимли эмас.

1:11 Занон — бу ном ибронийчадаги ташқарига чиқмоқ сўзига оҳангдош. Бироқ бу шаҳар аҳолиси ташқарига чиқиб, душманга қаршилик кўрсатишга асло журъат эта олмайди.

1:11 Байт-Эзел — ибронийчадаги маъноси қўшни уй. Лекин бу шаҳар аҳолиси яхши қўшни бўла олмайди, чунки улар ўз юртдошларига бошпана бера олмайди.

1:12 Морўт — бу ном ибронийчадаги аччиқ сўзига оҳангдош. Бу сўз кўчма маънода бўлиб, изтиробу аламга ишора қиласди.

1:13 Лахиш — бу ном ибронийчадаги жанговар отлар иборасига оҳангдош. Лахиш шаҳри мустаҳкам қалъа бўлиб, жанговар отлар ва жанг араваларига эга эди. Тўлиқроқ маълумотга эга бўлиш учун луғатдаги ЖАНГ АРАВАСИ иборасига ва унга ишланган расмга қаранг.

1:13 Қуддус аҳли — ибронийча матнда Қиз Сион, Қуддус аҳлига нисбатан қўлланган шеърий усул. 3:10 изоҳига қаранг.

1:13 ...Қуддус аҳлини илк бор гуноҳга бошладингиз! — бу ерда Михо қандай гуноҳни назарда тутгани аниқ эмас. Лахиш аҳолиси Яхудо халқини бутпарастликка бошлагани ёки Худога умид боғламай, ҳарбий кучига, отлару жанг араваларига ишонгани назарда тутилган бўлиши мумкин (5:10 га ва Ишаё 31:1, Хўшёя 10:13, 14:3 га қаранг).

1:14 Мўрашат — ибронийча матнда бу исмнинг бошқа варианти *Мўрашат-Гат*. Михо пайғамбар шу қишлоқда таваллуд топган эди (шу бобнинг 1-оятига ва ўша оятнинг учинчи изоҳига қаранг).

1:14 Энди Мўрашат билан хайрлашаверинг, Эсадалик совғаларингизни уларга тақдим қилинг — ибронийча матндан сўзма-сўз таржимаси Энди Мўрашат учун қалин беринглар. Мўрашат номи ибронийчадаги унаштирилган сўзига оҳангдош. Турмушга чиқаётган қиз ўз отасининг уйидан чиқиб кетганидай, Мўрашат аҳолиси ҳам ўз уйларидан чиқиб кетадилар. Михо пайғамбар бу ўринда сўз ўйини қилиб, Мўрашат аҳолисининг сургун бўлишига ишора қиласди.

1:14 Ахсиб — бу ном ибронийчадаги ёки панд берувчи сўзига оҳангдош.

1:15 Моришио — бу ном ибронийчадаги ғолиб сўзига оҳангдош.

1:16 ...Сочингизни қирдиринг — сочни қириш умидсизликни ва қайғули ҳолатни ифодалайди.

1:16 ...фарзандларингиз...болаларингиз... — Яхудонинг шаҳарлари ва қишлоқларидағи аҳолига нисбатан қўлланган шеърий усул.

2:1 ёвузликни режсалаштирганлар — шу бобнинг 1-11-оятларида Михо Самария ва Қуддусдаги нуфузли одамларни огоҳлантириб, камбағалларга зулм

үтказғанлари учун уларга қарши башорат қиляпти.

2:4 душманлар — ёки арзимас одамлар ёхуд хиёнаткорлар.

2:7 Ёқуб насли — шу бобнинг 1-ояти изоҳига қаранг.

2:9 Фарзандларининг насибасини Менинг юртимдан уздингиз — ибронийча матндан сўзма-сўз таржимаси Фарзандларини Менинг улуғворлигимдан то абад маҳрум қилдингиз. Бу гапдаги Менинг улуғворлигим ибораси Худо Ўз халқига берган юртни билдириса керак.

2:12 Ёқуб насли — Худо Ёқубнинг исмини Исроил деб ўзгартирган (Ибтидо 32:27-28 га қаранг), шунинг учун кўпинча Ёқуб насли деганда Исроил, яъни шимолий шоҳлик аҳолиси назарда тутилади. Бироқ бу ўринда мазкур исм ҳам Исроил, ҳам Яхудо халқларига нисбатан ишлатилган. Ёқуб бу иккала халқнинг бобокалони бўлган.

3:1 ...Ёқуб...Исроил... — бу ўринда Михо Яхудога, яъни жанубий шоҳликка ишора қилмоқда (шу бобнинг 9-10-оятларига қаранг).

3:8 ...Ёқуб...Исроил... — шу бобнинг 1-ояти изоҳига қаранг.

3:10 Сион — Куддусдаги Маъбад қурилган тепалик Сион тоғи деб аталган. Эски Аҳддаги шеърий парчаларда ва пайғамбарлар битикларида Сион сўзи кўпинча Куддус шаҳрига ёки Худонинг халқига нисбатан ишлатилган. Тўлиқроқ маълумотга эга бўлиш учун луғатдаги СИОН сўзига қаранг.

3:12 Эгамизнинг уйи турган тоғ — Куддусдаги Сион тоғига ишора. 3:10 изоҳига қаранг.

4:1 Эгамизнинг уйи турган тоғ — Куддусдаги Сион тоғига ишора. 3:10 изоҳига қаранг.

4:8 ...Куддус...Куддус шаҳри... — ибронийча матнда ...қиз Сион...қиз Куддус.... Шеърий усулда кўлланилган мазкур ибронийча иборалар Куддус шаҳрига ёки унинг аҳолисига ишора қиласди (шу бобнинг 10, 13-оятларида ҳам бор). 3:10 изоҳига қаранг.

4:10 Куддус — ибронийча матнда Сион (шу бобнинг 11-оятида ҳам бор).

4:10 ...Бобилга сен сургун бўласан — милоддан олдинги 586 йилда Бобил шоҳи Навуходназар Куддусни вайрон қилиб, аҳолининг асосий қисмини Бобилга сургун қилган эди (4 Шоҳлар 25:1-21 га қаранг).

4:13 Янчиб ташланг уларни! — донни бошоқдан ажратиш жараёни янчиш дейилади. Қадимги Яқин Шарқда дон янчиш учун баъзан хўқизларни дон бошоқлари устидан юрғизишарди. Янчиш сўзи кўпинча Эски Аҳдда ҳукмга ёки урушда ҳалокатга дучор бўлишга нисбатан кўчма маънода ишлатилган. Мазкур оятда Куддус аҳолиси ўз душманини босиб эзадиган кучли хўқиздай тасвирланган.

5:1 Ганимлар бизни қуршовга олди! — 4:10 нинг иккинчи изоҳига қаранг.

5:1 ...бетига таёқ билан уради — ёки ...бетига салтанат ҳассаси билан уради. Салтанат ҳассаси куч-қудрат ва ҳукмронлик рамзи эди. Бу ўринда Довуд зурриётидан бўлган шоҳнинг бутунлай мағлуб бўлиши ва хор қилиниши англашилади.

5:2 ...сендан чиқади — Худо ваъда қилган ҳукмдор, яъни Масих, шоҳ Довуд зурриётидан келиб чиқади. Шоҳ Довуд ҳам Байтлаҳмда таваллуд топган эди (1 Шоҳлар 17:12 га қаранг). Тўлиқроқ маълумотга эга бўлиш учун луғатдаги

МАСИХ сўзига қаранг.

5:5-6 Оссурия — қадимги қудратли шоҳлик. Унинг пойтахти Найнаво шаҳри ҳозирги Ироқнинг шимолида жойлашган эди. Тўлиқроқ маълумотга эга бўлиш учун лугатдаги ОССУРИЯ сўзига қаранг. Бу оятда Михо пайғамбар айнан Оссурия шоҳлигини эмас, балки рамзий маънода Худога ва Унинг азиз халқига қарши чиққан душманларни назарда тутган бўлиши мумкин. Михо Оссурияни Нимрӯднинг ери деб атashi ҳам шундан далолат беради, чунки Нимрӯд шарқда асос солган қудратли шоҳлик доим Истроил юртига тажовуз қилиб келган (Ибтидо 10:8-12 га қаранг).

5:7 Ёкуб насли — 2:12 изоҳига қаранг.

5:14 Ашера — Канъондаги халқлар сажда қилган ҳосилдорлик худоси бўлиб, аёл қиёфасида тасаввур қилинган. Унинг эркак жуфти Баал эди. Ашеранинг тасвиirlари баланд устун шаклида бўлиб, ёғочдан ясалган эди.

6:2 Заминнинг мангу пойдеворлари — қадимда Истроил халқининг тасаввурига кўра, ер теп-текис бўлиб, ер остида буюқ денгиз бор эди, денгиз тубида ўрнатилган улкан устунлар ерни ушлаб турарди. Бу устунлар денгиз тубидаги пойдеворга таянарди.

6:5 ...Нималар юз берганини бир эсланг — Болоқ билан Балом Истроил халқини лаънатлашга қанчалар уринмасин, Худо Истроилга барака берар эди (Саҳрова 22:1-24:25 га қаранг). Худо Иордан дарёсининг сувларини тўхтатиб, Ўз халқини дарёнинг шарқидаги Шитимдан ғарбдаги Гилгалга эсон-омон олиб ўтди, ваъда қилган юртни уларга берди (Ёшуа 3:1-4:19 га қаранг).

6:9 Яхшилаб қулоқ солинг! Мен сизларни ҳадемай жазолайман! — ибронийча матндан сўзма-сўз таржимаси *Калтакка ва уни Тайинлаганга қулоқ сол!* Бу ўринда калтак шахс тимсолида бўлиб, Худо берадиган жазога ишора қиласди.

6:15 Узум эзасиз... — қадимги пайтларда одамлар узумни қоятошга ўйилган чуқурга ёки тупроқдан қазилган, тубига ва атрофига зич қилиб тош терилган чуқурга солиб, шарбатини сиқиб олиш учун оёқлари билан эзардилар. Шарбат ўша чуқурдан яна бошқа бир чуқурга оқиб тушарди.

6:16 ...Омри...Ахаб... — Михо пайғамбар давридан олдин Истроилда, яъни шимолий шоҳлиқда ҳукмронлик қилган икки шоҳ. Омри ва унинг ўғли Ахаб ўзларининг бутпарастлиги ва ўта қабиҳлиги билан танилган эдилар (З Шоҳлар 16:25-33 га қаранг).

6:16 ...Барча халқлар сизларни ҳақорат этади — қадими юнонча таржимадан. Ибронийча матнда ...*Менинг халқим сизларни ҳақорат этади.*

7:4 Соқчилар — Худо Ўз халқини огоҳлантириб, тавба қилишга ундаш учун юборган пайғамбарлар назарда тутилган.

7:12 Ўша қуни халқинг қайтиб келади — Ишаё 11:11-12, 27:12-13, Закариё 10:8-10 га қаранг.

7:14 ...чакалакзорда яшаяптилар — вайронага айланган шоҳлиknинг мажозий ифодаси (З:12 га қаранг).

7:14 Башан ва Гилад — Иордан дарёсининг шарқ томонидаги ерлар бўлиб, ўзининг кўум-кўк яловлари ва наслдор, соғлом чорваси билан машхур эди.

7:20 ...ота-боболаримизга онт ичганингдай... — Ибтидо 12:1-3, 18:18-19, 22:15-18, 28:10-15 га қаранг.